

- 1' Wer nit kan sprechen ja vnd neyn
- 2' Vnd pflegen rott vmb groß vnd kleyn
- 3' Der hab den schaden jm alleyn



### Nitt volgen gutem ratt.

- 1 Der ist eyn narr der wiß will syn
- 2 Vnd weder glympff / noch moß dút schyn
- 3 Vnd wenn er wißheyt pflegen will
- 4 So ist eyn gouch syn fãderspyl /

5 Vil sint von worten wyse vnd klüg  
6 Die ziehen doch den narren pflüg  
7 Das schafft das sie vff jr wißheytt  
8 Verlossen sich vnd bschydikeyt  
9 Vnd achten vff keyn frömden ratt  
10 Biß jn vnglück zū handen gat  
11 Syn sūn Thobias all zyt lert  
12 Das er an wysen ratt sich kert /  
13 Dar vmb das nit volgt gütem rott  
14 Vnd den veracht die hußfrow Loth  
15 Wart sie geplagt von gott dar von  
16 Vnd müst do zū eym zeichen ston /  
17 Do Roboam nit volgen wolt  
18 Den altten wysen / als er solt  
19 Vnd folgt den narren / do verlort  
20 Er zehen geschlecht / vnd bleib eyn dor /  
21 Hett Nabuchodonosor Daniel ghört  
22 Er wer nit jnn eyn thier verkört  
23 Machabeus der sterckest man  
24 Der vil groß tugent hat getan  
25 Hett er gefolget Jorams rott  
26 Er wer nit so erschlagen dot /  
27 Wer allzyt folgt sym eygnen houpt  
28 Vnd gütem rott nit folgt vnd gloubt  
29 Der acht vff glück vnd heyl gantz nüt  
30 Vnd will verderben ee dann zytt  
31 Eyn fründes rott nyeman veracht  
32 Wo vil rät sint / ist glück vnd macht  
33 Achitofel sich selber dot  
34 Das Saul nitt volget synem rott